

## **ЖИЗЗАХ ТУМАНЛАРАРО ИҚТИСОДИЙ СУДИ А Ж Р И М**

(Даъво аризани кўрмасдан қолдириш тўғрисида)

**Жиззах**

**шаҳри**

**2023 йил 04 май**

Жиззах туманлараро иқтисодий суди судьяси У.Базаров раислигида, судья ёрдамчиси Ш.Каримовнинг котиблигида, Ўзбекистон фермер, деҳқон хўжаликлари ва томорқа ер эгалари Шароф Рашидов туман Кенгаши “JUICE GOODS” фермер хўжалиги манфаатида “JIZZAX INDUSTRIAL TO’QIMA” МЧЖдан қарздорликни ва пеняни ундириш тўғрисидаги даъво ариза бўйича иқтисодий ишни даъвогар вакили Ж.Убайдуллаев (фермер хўжалиги раҳбари) ва жавобгар вакили Ў.Акабоев (07.01.2023 йилдаги 3-сонли ишончнома асосида) иштирокида, Кенгаш вакили иштирокисиз, Жиззах туманлараро иқтисодий суди биносида, очиқ суд мажлиси муҳокамасида кўриб чиқиб, қуйидагиларни

### **а н и қ л а д и:**

Ўзбекистон фермер, деҳқон хўжаликлари ва томорқа ер эгалари Шароф Рашидов туман Кенгаши “JUICE GOODS” фермер хўжалиги (бундан буён матнда даъвогар деб юритилади) манфаатида Жиззах туманлараро иқтисодий судига даъво аризаси билан мурожаат этиб, “JIZZAX INDUSTRIAL TO’QIMA” МЧЖдан (бундан буён матнда жавобгар деб юритилади) 121.174.444 сўм асосий қарзи ва 36.352.333 сўм пеня ундиришни сўраган.

Суд мажлисида иштирок этган даъвогар вакили Ж.Убайдуллаев, судга даъводан воз кечиш тўғрисида аризани тақдим этиб, даъводан воз кечиш тўғрисидаги аризани қабул қилишни ва даъво аризани кўрмасдан қолдиришни сўради.

Суд мажлисида иштирок этган жавобгар вакили Ў.Акабоев, даъвогарнинг даъводан воз кечиш тўғрисида аризасини қабул қилишни ва даъво аризани кўрмасдан қолдиришни сўради.

Суд, иш хужжатларини ўрганиб чиқиб, қуйидаги асосларга кўра, даъвогарнинг даъвосидан воз кечишини қабул қилишни ва даъво аризани кўрмасдан қолдиришни лозим деб ҳисоблайди.

Иш хужжатларида, даъвогар “JUICE GOODS” фермер хўжалиги томонидан судга тақдим қилинган ариза мавжуд бўлиб, унда даъводан воз кечиш тўғрисидаги аризани қабул қилиш ва даъво аризани кўрмасдан қолдириш сўралган.



Ўзбекистон Республикаси Иқтисодий процессуал кодекси (кейинги ўринларда – ИПК деб юритилади)нинг 157-моддаси иккинчи қисмига кўра, даъвогар ишни ҳар қандай инстанция судида кўришда тегишли суд инстанциясида ишни кўриш якуни бўйича чиқариладиган суд ҳужжати қабул қилингунига қадар даъводан тўлиқ ёки қисман воз кечишга ҳақли.

Мазкур ҳолатда, суд даъвогар “JUICE GOODS” фермер хўжалигининг даъводан воз кечиши қонун ҳужжатларига ҳилоф эмаслигини, бошқа шахсларнинг ҳуқуқлари ва қонун билан кўриқланадиган манфаатларини бузмаслигини инобатга олиб, даъводан воз кечиш тўғрисидаги аризасини қабул қилишни лозим деб ҳисоблайди.

ИПКнинг 107-моддаси, биринчи қисми, 8-бандида даъвогарнинг манфаатларини кўзлаб прокурор, давлат органи ва бошқа шахс томонидан тақдим этилган даъводан даъвогар воз кечган бўлса, суд даъво аризани кўрмасдан қолдириши белгиланган.

Бундай ҳолатда, суд даъвогар “JUICE GOODS” фермер хўжалигининг даъводан воз кечиш тўғрисидаги аризасини қабул қилишни, суднинг 4-1301-2303/2175-сонли иши бўйича даъво аризани кўрмасдан қолдиришни, суд харажатлари масаласини муҳокама қилиб, олдиндан тўлаб чиқилган почта харажатини даъвогар “JUICE GOODS” фермер хўжалиги зиммасида қолдиришни лозим деб топади.

Ўзбекистон Республикаси Президентининг 2017 йил 10 октябрдаги ПК-3318-сон “Фермер, деҳқон хўжаликлари ва томорқа ер эгалари фаолиятини янада ривожлантириш бўйича ташкилий чора-тадбирлар тўғрисида”ги қарорининг 3-бандида, бешинчи хатбошида, Кенгаш фермер, деҳқон хўжаликлари ва томорқа ер эгалари манфаатларини кўзлаб судга давлат божи тўламасдан даъво аризалари, давлат ва хўжалик бошқаруви органлари, маҳаллий давлат ҳокимияти органларининг қарорлари, уларнинг мансабдор шахслари хатти-ҳаракатлари (ҳаракатсизлиги) устидан шикоятлар қилинганда даъво аризасини қаноатлантириш рад этилганда манфаати кўзлаб даъво аризаси киритилган фермер, деҳқон хўжаликлари ва томорқа ер эгаларидан давлат божи ундирилмаслиги белгиланган.

Суд, мазкур қарорга асосан даъвогардан давлат божи ундирмасликни лозим деб ҳисоблайди.

Юқоридагиларга асосан, Ўзбекистон Республикаси Иқтисодий процессуал кодексининг 110-моддаси 6-банди, 118, 157 ва 195-моддалари ва Пленум қарорига асосланиб, суд

**А Ж Р И М Қ И Л Д И :**



Даъвогар “JUICE GOODS” фермер хўжалигининг даъводан воз кечиш тўғрисидаги аризаси қабул қилинсин.

Ўзбекистон фермер, деҳқон хўжаликлари ва томорқа ер эгалари Шароф Рашидов туман Кенгашининг “JUICE GOODS” фермер хўжалиги манфаатида киритган даъво аризаси кўрмасдан қолдирилсин.

Даъвогар “JUICE GOODS” фермер хўжалиги томонидан олдиндан тўлаб чиқилган 30.000 сўм почта харажати ўз зиммасида қолдирилсин.

Ажримдан норози бўлган тарафлар бир ой муддат ичида шу суд орқали Жиззах вилоят судининг Иқтисодий ишлар бўйича судлов ҳайъатига апелляция шикояти бериши (протест келтириши) мумкин.

**Раислик қилувчи, судья**  
**У.С.Базаров**

